

四庫全書

子部

欽定四庫全書

古今律歷考卷十二

明 邢雲路 撰

歷代四

歷代考

後漢律歷志

漢興北平侯張蒼首正律孝武置協律官元始中劉歆
典領鐘律班固取以為志然率多古法也至元帝時郎
中京房字君明對言受學故小黃令焦延壽六十律相

生之法以上生下皆三生二以下生上皆三生四陽下
生陰陰上生陽終於中呂而十二律畢矣中呂上生執
始執始下生去滅上下相生終於南事而六十律畢矣
房謂竹聲不可調度乃作準定數以為六十律清濁之
節無何京房坐棄市律與準皆廢夫古律五音十二律
自帝舜言之後泠州鳩傳之管子發明之所由來舊矣
京房乃於十二律之外自執始去滅至分鳥南事凡演
為四十八律厥名厥義不知出何故實且每律統五統

四統三不一亦有隔九相生者其三分損益不盡之算
或棄或增乖戾無次抑又何也豈焦氏之法乎非耶焦
延壽曰得我道以亡身者京生也焦氏隱身自保使道
可亡身焦胡不亡乃焦氏逆知京必亡者知京所用非
其道也房得焦氏之道而謬用其道觀其步天不明晦
朔誤為朏昃妄附肅舒事應然則何禱不幻何假不作
執始諸名準絃諸數皆京房鑿空之為也焦氏前知知
足以殺其身而已矣

其論候氣謂天子常以日冬至夏至御前殿合八能之士陳八音聽樂均度晷景候鐘律效則和否則占引易緯云冬至人主不出宮寢兵從樂五日擊黃鐘之磬公卿大夫列士之意得則陰陽之晷如度數夏至之日如冬至之禮冬至之日樹八尺之表日中視其晷晷如度者其歲美人民和順晷不如度者則歲惡人民多譌言政令為之不平晷進則水晷退則旱進一尺則日食退一尺則月食月食則正臣下之行日食則正人主之道斯

言非也候氣之法原出不經易緯乃後人所作偽書其說皆非是蓋冬至之景午景也如其度者乃午正初刻冬至也若前少後多為減差則冬至在午前前多後少為加差則冬至在午後無論午前午後但非午正初刻冬至者午景俱退而短殊無進而長之理冬至八尺表日晷退不過寸許亦無退一尺者至進分釐亦無況進一尺乎易緯並不知測晷為何事而鑿空妄言以欺人且附之以吉凶徵應載在史冊流傳至今幾何而不迷

亂後人之耳目也

太初三統歷行百餘年歷稱後天朔或在晦月見至元
和失天益遠冬至日在斗二十一度而歷以為牽牛中
星差天五度晦朔弦望差天一日先立春一日以折獄
斷大刑於氣已迂而望平和歷時之義蓋亦遠矣章帝
知其謬故召治歷編訢李梵改行四分以遵於堯以順
孔聖奉天之文訢梵以十一月當先大諸臣謂當先小
不知月之大小隨月而定豈有十一月先大先小之說

四分與三統皆用斗分二十五刻其失則均惡在其為
遵堯順孔奉天也

賈逵論歷謂以太初歷考漢初盡太初元年日朔二十
三事共十七得朔四得晦二得二日新歷七得朔十四
得晦二得三日以太初歷考太初元年盡更始二年二
十四事十四得朔十得晦新歷十六得朔七得二日一
得晦以太初歷考建武元年盡永元元年二十三事五
得朔十八得晦新歷十七得朔三得晦三得三日又以

新歷考春秋二十四事失不中者二十三事天道參差不齊必有餘又有長短不可以等齊故保乾圖識云三百年斗歷改憲又謂黃道度日月弦望多近史官一以赤道度之不與日月同夫以三統四分治歷俱大半不得朔而以授時治春秋與漢歷則亡一之不朔則豈有天道長短不齊之理又何必三百年即一改耶黃赤道不同而系於一機以赤道變黃道百世可知者也

永元霍融論歷謂漏刻率九日增減一刻不與天相應

夫漏刻自今日午正初刻至明日午正初刻均分百刻
定為的數而天日之行乃以刻定之均分十二時子午
昏明隨日而驗則漏刻之中何必有增減之差與天不
相應也

延光論厯太初晦月見西方食不與天相應四分復謬
不可施行謂三大二小皆疏遠其言俱是

漢安邊韶論太初厯以乾鑿度八十一分日之四十三
為日法四分厯以三百六十五度四分度之一為周天

復得庚申著於圖讖其元則上統開闢其數則復古四分宜詔舉行不知乾坤鑿度有真有贗庖犧先文軒轅演籀蒼頡所修者真也周易附於後述孔子言者乃後人書之不得為先文贗也觀其載孔子之言曰厯以三百六十五日四分度之一為一歲七十六為一紀日法二十九日與八十一分日四十三以步至圻當日者而易一大周一歲之周以卦用事六爻六日一日天王諸侯二日大夫三日卿四日三公五日辟六日宗廟而又

歸於符錄圖讖之說詳其術四分度之一四年積一日
故云四分七十六乃四章歲為一紀名為部法積日二
十九以八十一分除日之四十三得五十三刻八分六
十四秒零以加於二十九日下共二十九日五十三刻
八分六十四秒乃太初厯之朔實四章之月九百一十
二及閏月二十八共九百四十為部積月以部法乘三
百六十五日四分日之一得二萬七千七百五十九為
部積日為一紀以二十乘部法得積歲千五百二十以

二十乘部月得積月萬八千八百以二十乘部日得積日五十五萬五千一百八十為一部首更置一紀之部日以六十四乘之得積日百七十七萬六千五百七十六又以六十乘部首三十二得積部首百九十二以二十乘之得積紀三千八百四十紀又云紀數以七十六乘紀數得積歲二十九萬一千八百四十以三十二除之得九千一百二十周謂卦當歲者積歲每歲十二月并章月七得三百六十萬九千六百其中十萬七千五

百二十月者閏也以三百八十四爻除前積月之數得
九千四百周謂爻當月者以四分朔實二十九日五十
三刻八分五十一秒乘積月得積日萬六百五十九萬
四千五百六十日以萬一千五百二十圻除之得九千
二百五十三周謂圻當日者而易一大周此其術皆四
分厯之法也夫乾坤鑿度謂為孔子發明伏羲文王之
道也使果出於孔子之口定為厯本則宜毫髮無差古
今不易者然而四分之法其術甚疎以之制厯十失其

九一跬步不可行豈以義文而有是道豈以孔子而為是言其為贗書明甚或者即治四分歷諸人假作聖言以實已偽未可知也至於卦氣圖識之說尤屬悖謬一日諸侯二日大夫取何名義後之歷家不知亦收之歷數贅矣孔子立言明白簡易論語易傳不啻詳言何無一言及符錄圖識自此偽書一行章帝遂深信其說謂上統開闢復古四分合赤九會昌之識奏可施行豈知演紀上元復得庚申開闢之歲乃自下逆推演至歷元

各歷家俱有之非其真也堯咨羲和第云暮三百有六
旬有六日舉成數而言何嘗有四分度之一之說漢人
遂定為二十五刻悖也甚矣

熹平馮光陳晃論歷謂歷元不正故妖民叛寇益州盜
賊相續為歷用甲寅為元而用庚申圖緯無以庚為元
者蔡邕議光晃所據殷歷元也孝武用丁丑孝章用庚
申密於太初是新元效也二說皆非歷元乃自下逆推
之數非其真也於叛賊何豫丁丑庚申二者皆四分法

新元亦不效

漢人論本初元年天以十二月食歷以後年正月於是始差以法推質帝本初元年丙戌歲十二月不食次年桓帝建和元年丁亥歲正月辛亥朔卯時日食載在簡冊可考也以此例漢人論蝕之失

日行北陸謂之冬西陸謂之春南陸謂之夏東陸謂之秋者蓋漢冬至日躔在斗右轉而斗而女以次周天今萬歷年日躔在箕去古未遠其行猶昔若久之則天日

漸遠凡四陸皆可冬歷四時皆可北陸非一定也

四分歷日發其端周而為歲然其景不復四周千四百
六十一日而景復初是則日行之終以周除日得三百
六十五日四分日之一為歲之日數日日行一度亦為
天度日行十九周月行二百五十四周復會於端是則
月行之終也以日周除月周得一歲周天之數以日一
周減之餘十二十九分之七則月行過周及日行之數
也為一歲之月以除一歲日為一月之數月之餘分積

滿其法得一月月成則其歲月大四時推移故置十二中以定月位有朔而無中者為閏月中之始日節與中為二十四氣以除一歲日為一氣之日數也其分積而成日為沒并歲氣之分如法為一歲沒沒分於終中中終於冬至冬至之分積如其法得一日四歲而終月分成閏閏七而盡其歲十九名之曰章章首分盡四之俱終名之曰部以一歲日乘之為部日之數也以甲子命之二十而復其初是以二十部為紀紀歲青龍未終三

終歲後復青龍為元此其術也詳其術謂四分者二十
五刻也周歲其景不復四周成一日無餘分則景復初
仍子正初刻四為日法以四除千四百六十一得三百
六十五日二十五刻為歲之日數亦為周天日日行一
度與天度同日行十九周為一章名章法亦名章歲一
章之月二百三十五加章歲共二百五十四乃月行二
百五十四周亦云月會復會於端是為月行之終也以
日周十九除月周二百五十四餘十三日十九分日之

七再以十九歸其七共得十三度三十六分八十四秒
二十分為月平行度以日一周減前十三餘十二日十
九分日之七為一歲之月十二月以十二月除一歲之
日三百六十五日二十五刻得三十日四十三刻七十
五分為一月惟三十日故其月大以十二月乘三十日
四十三刻七十五分即三百六十五日二十五刻一歲
周天之數也十二中者十二中氣月無中氣則閏十二
節十二中併為二十四氣以除一歲之日得一十五日

二十一刻八十七分五十秒為一氣策若以日法四乘二十四氣得九十六以除周天一千四百六十一亦得氣策若先除十五日餘二十一為沒數亦云沒法倍沒數得四十二為中法七因沒法得一百四十七為章閏八因沒法得一百六十八為日餘一歲之沒成日餘二十五刻為一歲沒四歲無餘分以十九年七閏共二百三十五為章月以四因章月得一千一十六為月周三歸歲周三百六十五日二十五刻得一百二十一日

七十五刻以四因之得四百八十七為通法以章月乘
周天一千四百六十一得三十四萬三千三百三十五
為大周置十九年共六千九百三十九日七十五刻以
章月而一得二十九日五十三刻八分五十一秒為月
策再置一章之月以月會二百五十四而一得二十七
日三十二刻一十八分為交終以二十三食而復既為
食法二十三置三九二十七以五因之得一百三十五
為月數以二食法四十六乘章月得一千八十一為食

數以部法乘月數得一萬二百六十為部會率以二十
歸部會率得五百一十三為部會即二十七章之歲數
故又曰歲數以日法因部會率得四萬一千四十為元
會總計章法十九年章月二百三十五章日六千九
百三十九日七十五刻部法七十六年部月九百四十
月部日二萬七千七百五十九日紀法一千五百二十
年紀月一萬八千八百月紀日五十五萬五千一百八
十日元法四千五百六十年元月五萬六千四百月元

日一百六十六萬五千五百四十日蓋十九年為一章

四章為一部二十部為一紀

即八十章太初八十一
章今八十章

三紀為

一元故曰歲首至也月首朔也至朔同日謂之章

閏七
而盡

同在日首謂之部

章首分盡
四之俱終

部終六旬謂之紀

以甲子
命之二

十而復
其初

歲朔又復謂之元

紀青龍未終三終
歲復青龍甲寅

其數詳矣

然總之皆四分法也天日同度其元已差天正月大其

說悖理氣朔交轉各有差盈縮遲疾各有率而四分不

知一概以二十五刻齊之至於日食之數稟於盈縮與

遲疾者而四分以食法食數取則何怪乎亡一之合也
其失悉與太初同

四分厯演紀上元章帝元和二年乙酉歲距元積年九
千三百六十五以歲實三百六十五日二十五刻乘之
得三百四十二萬五百六十六日二十五刻得庚寅卯
正月初刻冬至以授時上推是年冬至分二十三日五十
九刻四十八分得丁亥未正一刻冬至四分厯較授時
後天三日曰演紀云者以自立之法推求往古生數之

始七政同度世代綿遠馴積其數至踰億萬後人厭其
布算繁多互相推考斷截其數而增損日法以為得改
憲之術此歷代積年日法所以不同也昔人謂建歷之
本必先立元元正然後定日法法定然後度周天以定
分至自黃帝立元用辛卯顓頊用乙卯虞用戊午夏用
丙寅殷用甲寅周用丁巳魯用庚子漢初承秦用乙卯
武帝用丁丑章帝用乙酉以上得庚申後諸歷轉相祖
述共七十八家未有舍此而能成者使立元果真積年

日法果確以推天步誰曰不可而乃非其然也四分之誤尤甚

四分歷推木星周三百九十八日八十四刻五十九分
火星周七百七十九日五十三刻二十三分土星周三
百七十八日五刻九十四分金星周五百八十四日二
刻四十一分水星周一百一十五日八十八刻一十三
分以較授時木星少三刻四十一分火星少三十九刻
六十七分土星少三刻二十二分金星多一十二刻一

十五分水星多五十三分且四分歷與太初歷雖有遲疾無遲疾差度况無盈縮及盈縮差度止用一平朔步算所以五星伏見非失之先則失之後朔無盈縮遲疾則日食或失之先或失之後皆非也



古今律歷考卷十二

欽定四庫全書

子部

古今律歷考卷十三至五

詳校官欽天監博士_臣張天樞

靈臺郎_臣倪廷梅覆勘

總校官知縣_臣楊懋珩

校對官五官靈臺郎_臣陳際新

謄錄監生_臣李克文

欽定四庫全書

古今律歷考卷十三

明 邢雲路 撰

歷代五

歷代考

晉書

晉書云傳稱黃帝使伶倫自大夏之西崑崙之陰取竹之嶰谷斷兩節間長三寸九分而吹之以為黃鐘之宮又云黃帝作律以玉為管長尺周禮太師掌六律六呂

以辨陰陽之聲及景王問律於泠州鳩其對六律六間甚悉至呂不韋言黃鐘之宮律之本也上下相生三分損益後代之言音律者多宗此說洎司馬遷作律書九三之為黃鐘之法參之十二辰為黃鐘之實實如法得黃鐘之律九寸上下相生陰陽得所班固律與馬遷同元帝時京房則作六十律嚴嵩傳之莫能為準蓋古典及今音家所用六十律者無施於樂惟以五聲十二律還相為宮之法制六孔十二笛有一定調故諸絃歌皆

從笛為正於遷固所生分寸數皆倍焉餘則竝同斯則
冷州鳩所謂六間之道贊助之法也已上諸說其論樂
詳矣獨其所云黃帝以三寸九分為黃鐘則呂覽之誤
文未可信也蓋冬至一陽來復根株黃泉之下其管必
長其氣乃動故其音渾渾然濁冷州鳩於黃鐘名之為
一謂為宣養六氣九德也曰宣養則初出尚微養之而
已由是第之乃二曰太簇謂為贊陽出滯然後次之姑
洗至應鐘而極以漸宣布散越和展秀利其釋名各異

焉若黃鐘遽短而清則泠州鳩何以始名宣養次乃出
滯卒方散利耶夫亦焉有宣養之初即輕清而散利之
後反重濁耶故管子曰宮聲如牛鳴窖中正狀其濁也
况黃鐘九寸上下相生三分損益其數乃符若黃鐘三
寸九分則宜用何術步算也泠州鳩管子去古未遠相
傳必真而晉人誤信三寸九分之說使後之疑者遂緣
此生議其無謂甚矣晉書又云黃帝作律以玉為管長
尺曰尺則與九寸相近與三寸九分懸絕既而魏晉製

律則皆遵黃鐘九寸之法無異術夫一人也忽然曰黃
帝黃鐘三寸九分又忽然曰黃帝黃鐘長尺又忽然背
黃帝仍用九寸為黃鐘何言之不相顧也

晉書論劉歆造三統歷以說左傳辯而非實班固惑之
采以為志是編訖改行四分七十餘年儀式乃備非蓋
三統四分其失均也

漢靈帝光和中命會稽東部尉劉洪同蔡邕共修律歷
漢歷三統四分皆四分之一餘分太强劉洪始覺冬至

後天乃減歲餘更以五百八十九為紀法百四十五為斗分考冬至日日在斗二十二度又創制日行遲速兼考月行陰陽交錯於黃道表裏日行黃道於赤道宿度復進有退作乾象厯鄭玄受其法加以註釋司馬彪因之以繼班史云詳其術乾象演紀上元己丑以來至建安十一年積七千三百七十八年得丙戌歲以五百八十九年為紀法乃三十一章之年也計二百六十一年差一日一紀差二日二十五刻有奇以減一紀五百八

十九年所積四分度之一之日一百四十七日二十五刻餘一百四十五日為斗分以紀法乘三百六十五日得二十一萬四千九百八十五日加斗分一百四十五日共得二十一萬五千一百三十日為周天以紀法而一得三百六十五日二十四刻六十一分八十秒為歲實以紀月七千二百八十五歸周天得二十九日五十三刻五分四十秒為朔實以周日法五千九百六十九除歷周天一十六萬四千四百六十六得二十七日五

十五刻三十三分五十九秒為轉終以日周七千八百七十四歸周天得二十七日三十二刻一十五分六十四秒為交終交終較授時多十刻九十分計十年多十四日距交既遠以課虧蝕不效矣乾象木星周三百九十八日八十八刻一分火星周七百七十九日四十八刻四十八分土星周三百七十八日八刻金星周五百八十四日二刻一十四分水星周一百一十五日八十八刻二十九分各有不同查五星歷代各不同總之皆

未得其精即授時亦然所以至今五星多有乖失必也
觀象儀度另立差法乃得其真固有待而為也洪以五
歸周天為通法以五歸紀月為日法以日法除通法得
朔實則日法通法所宜用也然日法宜千四百五十七
而歷四百五十七少千通法宜四萬三千二十八而歷
四萬三千二十六少二又周天宜二十一萬五千一百
三十而歷二十一萬五千一百四十多十章月宜二百
三十五而歷二百四十五多十何也我知其故矣日法

少千周天多十章月多十皆史書誤刻也即後推五星
日法千四百五十七周天二十一萬五千一百三十章
月二百三十五皆正知前誤刻非洪之差也至於通法
宜餘八而卻六者以紀月除周天數尚少以推月策之
分秒為真至於五歸其數多則月策之分秒積實而上
不無稍多故洪去其二亦權宜之術耳不則以紀月歸
周天得二十九日五十三刻五分四十秒以五歸之紀
月歸五歸之周天得二十九日五十三刻一十九分一

十四秒較前分多矣故減通法之二為是也大都三統四分皆不知斗分之太多洪覺而減之漢歷無日月盈縮遲疾洪仰觀黃赤表裏陰陽交錯創立盈縮損益之數以合天步雖其分數不無少差然以千古不明之竅自洪始發之使後人循此推測漸詣其精如晦始明如夢斯醒則洪之功大矣所惜者第於漢歷之先天餘後小餘滿法上加歲月一換其瑣屑之狀仍舊貫未霍然釐去之為缺也

魏文帝黃初中韓翊以為乾象減斗分太過造黃初厯以四千八百八十三為紀法千二百五十為斗分其所校厯更相是非無時而決徐岳議韓翊用洪法小益斗分至於日蝕有不盡效夫以黃初二年六月二十七日戊辰加時未日蝕乾象術加時申半強於消息就加未黃初以為加辛強乾象後天一辰半強為近黃初二辰半為遠消息與天近今以授時考之是年七月戊辰朔未時日蝕非六月二十七日查晉志二年七月十五日

癸未月食則初一己巳此之戊辰乃六月二十九晦或
九字誤為七也岳議三年正月丙寅朔加時申十一月
二十九日庚寅晦加時申皆食黃初乾象各遠近異授
時則正月丙寅朔午十二月庚申朔未非正月丙寅之
申亦非十一月庚寅晦也蓋二厯交終疎所以課日不
效其所步五星尤疎

魏尚書郎楊偉表稱漢厯疏闊臣考驗天路更建密厯
以大呂之月為歲首以建子之月為厯初漢武改元太

初因名太初歷今改元景初宜曰景初歷臣之所建景初歷法數則約要施用則近密治之則省功學之則易知雖復使研桑心算隸首運籌重黎司晷羲和察景以考天路步驗日月究極精微盡術數之極者皆未能並臣如此之妙也是以累代歷數皆疏而不密自黃帝以來常改革不已壬辰元以來至景初元年丁巳歲四千四十六算止此元以天正建子黃鐘之月為歷初元首之歲夜半甲子朔旦冬至詳其術演紀上元壬辰以來

至景初元年積四千四十六年得丁巳歲以萬一千五
十八為一元乃六紀之年也以千八百四十三為一紀
乃九十七章之年也計三百二十年有奇差一日一紀
差五日七十五刻以減一紀千八百四十三年所積四
分度之一之日四百六十七日七十五刻餘四百五十
五日為斗分以紀法乘三百六十五日得六十七萬二
千六百九十五日加斗分四百五十五日共得六十七
萬三千一百五十日為周天以紀法而一得三百六十

五日二十四刻六十八分八十秒為歲實以一紀之月
二萬二千七百九十五月歸周天得二十九日五十三
刻五分九十八秒為朔實五歸周天得十三萬四千六
百三十為通數五歸紀月得四千五百五十九為日法
若以日法歸通數亦得朔實以紀法併一紀之月得二
萬四千六百三十八為月周以日法除通周十二萬五
千六百二十一得二十七日五十五刻四十五分五秒
為轉終以月周除周天得二十七日三十二刻一十六

分一十七秒為交終以較授時亦計十年多十四日其課蝕不效同景初木星周三百九十八日八十四刻七十九分火星周七百八十日八十三刻三十三分土星周三百七十八日九刻六十三分金星周五百八十四日八刻八十六分水星周一百一十五日七十八刻六分是五星較各厯分數亦各不同以待更而後定者夫楊偉謂漢厯疏闊自稱厯密雖重黎羲和復出皆未能如已之妙則宜有奇籌密布度越前人也乃其術盡皆

劉洪之故法特別立一名耳漫改斗分反增歲餘以布諸法亦何益也偉以日道表裏交會遲疾添於紀首而不知洪之盈縮遲疾進退損益已有之矣其月食表裏所在則即洪之黃道去極也至於以建丑為正改其年三月為孟夏四月尤屬無謂三年帝崩乃復用夏正其劉氏在蜀仍漢四分歷吳常侍王蕃以洪術精妙制儀象故孫氏用乾象歷至吳亡晉武帝泰始元年因魏之景初歷改名泰始歷然即一歷也大都黃初已後改作

歷術皆斟酌乾象所減斗分朔餘月行陰陽遲疾以求折衷洪術為後代推步之師表云

晉劉智推三百年斗歷改憲以為四分法三百年減一日以百五十為度法三十七為斗分皆屬浮說杜預著春秋長歷謂天行不一宜改憲以從乃作乾度歷其術合日行四分數而微增月術用三百年改憲之意以較古歷日蝕微勝然而四分之法三百年改憲之說非通論也至穆帝永和八年王朔之造通歷以甲子為上元

積九萬七千年以四千八百八十三為紀法千三百五
為斗分施行亦不協

後秦姚興時當孝武太元九年甲申歲天水姜岌造三
紀甲子元歷其畧言春秋日蝕與殷歷魯歷皆不應服
虔解傳用太極上元太極上元乃漢三統歷難施於春
秋襄公二十七年十一月朔日蝕應在此月非再失閏
劉歆歷日蝕多在二日因附五行傳著眊昃之說不曰
歷失天而反寃天也杜預論所傳七歷非時王之術為

是皆斗分疏也斗分殷四分一三統一千五百三十九分之三百八十五乾象五百八十九分之一百四十五景初一千八百四十三分之四百五十五殷斗分麤故不施於今乾象斗分細故不通於古景初斗分雖在麤細之中而日之所在乃差四度課蝕不效今治新厯以二千四百五十一分之六百五為斗分日在斗十七度以考春秋三十六蝕正朔者二十五蝕二日者二蝕改者二誤者五春秋至今一千餘歲蝕多在朔豈三百歲

斗歷改憲者乎甲子上元以來至魯隱元年己未歲凡
八萬二千七百三十六至晉孝武太元九年甲申歲凡
八萬三千八百四十一算乃作三紀歷斯歲所言皆是
足破前古之疑獨其所考春秋日蝕尚有蝕二日者二
以授時考之則皆朔也蓋歲已得其十之七八至授時
則益精耳

姜岌三紀歷以一百二十九章之歲二千四百五十一
為紀法以三紀之歲七千三百五十三為元法三紀為

元故曰三紀厯爰定以三百一十六年有奇差一日一
紀差七日七十五刻以減一紀二千四百五十一年所
積四分度之一之日六百一十二日七十五刻餘六百
五日為斗分以紀法乘三百六十五日得八十九萬四
千六百一十五日加斗分六百五日共得八十九萬五
千二百二十日為周天以紀法而一得三百六十五日
二十四刻六十八分三十八秒為歲實以百二十九章
乘章月二百三十五得三萬三百一十五為紀月以紀

月歸周天得二十九日五十三刻五分九十五秒為朔
實五歸紀月得六千六十三為日法五歸周天得一十
七萬九千四十四為通數以日法除通數亦得朔實以
日法除通周十六萬七千六十三得二十七日五十五
刻四十五分一十秒為轉終以月周三萬二千七百六
十六除周天得二十七日三十二刻一十六分一十三
秒為交終且紀月周天自足用矣焉用五歸相仍不易
不知其何故也爰之歷較前為詳而交終之多則與景

初同於五星亦未見考正其最切者則以月蝕檢日宿
度所在為厯術者宗焉又著渾天論以步日於黃道駁
前儒之失竝得其中獨柰何其厯未見之施行也五歸
紀月

周天之類有何取義不過亂其端緒使人莫測厯
家專務此術後來者益多甚有千萬其乘除者

古今律厯考卷十三

欽定四庫全書

古今律歷考卷十四

明 邢雲路 撰

歷代六

歷代考

宋書

宋書論京房增律引仲中呂上生執始下生至於南事
為六十律竟復不合彌益其疎劉歆三統歷疏闕揚雄
心惑其說采為太玄班固謂之最密著於漢志為不知

而妄言其說皆是

宋高祖頗好厯數太子率更令何承天私撰新法元嘉二十年上表云月盈則蝕必當其衝以月推日則躔次可知堯典仲夏星火今季夏火中堯仲秋星虛今季秋虛中爾來二千七百餘年所差二十七八度則堯冬至日在須女十度左右也漢太初冬至在牽牛初漢四分及魏景初同在斗二十一臣以月蝕檢之則景初之冬至應在斗十七又以土圭測景考校二至差三日有餘

然則今之冬至在斗十三四矣詔令以月蝕檢土圭測
悉如承天所上奏二十二年普用元嘉厯詔可

元嘉厯以上元庚辰至元嘉二十年癸未五千七百三
年算外以一百九十二章積三千六百四十八年為元
法以三十二章積六百八年為紀法以紀月七千五百
二十十得一七百五十二為日法以紀法除通數二萬
二千二百七得三百六十五日二十四刻六七一為歲
實以日法除通數得二十九日五十三刻五分八五為

朔實以日法除通周二萬七百二十一得二十七日五十五刻四五二一為轉終以月周四千六十四除周天十一萬一千三十五得二十七日三十二刻一六〇四為交終五星木周日三百九十八日八十七刻二五火周日七百七十九日七十五刻九二土周日三百七十八日七刻九七金周日五百八十三日九十五刻七三水周日一百一十五日八十六刻九八各有不同是厯較前頗密其測晷漏刻綽有規則

祖冲之字文遠范陽道人。也。稽古有機思。始元嘉中。用何承天所製歷比古十一家為密。冲之以為尚疎。乃更造新法。上表言之。世祖孝武帝令朝士善歷者難之。不能屈其術。以舊章法十九歲七閏經二百年。輒差一日。乃改章法三百九十一年。有一百四十四閏。推上元甲子至宋大明七年癸卯。五萬一千九百三十九算。外元法五十九萬二千三百六十五。乃十五紀之年也。紀法三萬九千四百九十一。乃一百一章之年也。章歲三百

九十一章閏一百四十四蓋三百九十一年有一百四十四閏故以是定章歲章閏章月四千八百三十六蓋一章三百九十一年每年十二月凡四千六百九十二月加一百四十四閏月共四千八百三十六月故以是定章月周天一千四百四十二萬三千八百四日是一紀之日也日法三千九百三十九者以一百一乘章月得四十八萬八千四百三十六以一百二十四而一得三千九百三十九為日法也月法一十一萬六千三百

二十一者以一百二十四除周天得數為月法也以紀
法除周天得三百六十五日二十四刻二八一四為歲
實以日法除月法得二十九日五十三刻五分九一為
朔實以通法二萬六千三百七十七除通周七十二萬
六千八百一十得二十七日五十五刻四六八七為轉
終以通法除會周七十一萬七千七百七十七得二十
七日二十一刻二三三為交終五星木周日三百九十
八日八十九刻二九火周日七百八十日三刻〇七土

周日三百七十八日六刻九五金周日五百八十三日九十三刻〇八水周日一百一十五日八十七刻九六各有不同已前交終疎至冲之始密已後諸歷雖立法各異率皆從大明厯出則冲之之長也柰何中郎將戴法興反覆數千言辯冲之非是悉屬乖謬蓋其時法興佞倖為世祖所寵天下畏其權無敢異議論者皆附之唯中書舍人巢尚之是冲之之術執據宜用上欲用冲之新法時大明八年也故須明年改元因此改厯未及

施行而宮車晏駕矣至梁天監初子暉之更修之於是始行焉宋何承天祖冲之立歲差法損歲餘益天周以正日躔尤為卓絕

魏書

魏肅宗孝明帝神龜初集張龍祥等九家厯合為一厯以李業興為主改元正光名正光厯正光三年冬十一月頒行之以壬子元至正光三年積十六萬七千七百五十算外得壬寅歲以五百五年為章歲以十九章而

一凡二十六章五七九以七閏因之應閏一百六十八
月為章閏以加於歲中五百五年每年十二月凡六千
六十月內共六千二百四十六月為章月十二章六千
六十年為一節十節六萬六百為一紀二紀十二萬一
千二百為一統三統三十六萬三千六百為一元而大
餘盡斗分者四分度之一為二十五刻一節六千六十
年計二千五百一十五日為古斗分業興覺氣不及天
度以一百五十九年半差一日六千六十年當差三十

八日以減古斗分餘一千四百七十七日為斗分以加於六千六十年每年三百六十五日計二百二十一萬一千九百日內共得二百二十一萬三千三百七十七日為周天分以六千六十年而一得三百六十五日二十四刻三七二九為歲實一部六千六十年計十二章以乘章月得七萬四千九百五十二即部月定為日法以月取日故曰日法以日法除周天得二十九日五十三刻五九二九為朔實以日法除通周得二十七日五十五刻

四五一四為轉終置部月加部法得周月八萬一千一
十二加一部三百一十九章共得八萬一千三百三十
一為交周以除周天得二十七日二十一刻四四三二
魏史缺交終今補此五星木周日三百九十八日七十
八刻八七火周日七百七十九日八十四刻二九土周
日三百七十八日五刻六二金周日五百八十三日八
十五刻水周日一百一十五日八十七刻一六魏歷大
都踵宋歷為之亦近密

東魏孝靜帝興和二年李業興以壬子厯氣朔稍違改
造興和厯以上元甲子以來積二十九萬三千九百九
十七算至興和二年得庚申歲以一百一萬一千六百
為元法三統之數也三十三萬七千二百為統法二紀
之數也十六萬八千六百為紀法十部之數也一萬六
千八百六十為部法又名度法三十章歲之數也五百
六十二為章歲以十九歸章歲凡二十九章五七八以
七閏因之得二百七為章閏以每年十二月乘章歲得

六千七百四十四為章中加章閏二百七共得六千九百五十一為章月以三十乘章月得二十萬八千五百三十為日法即節月以四千一百一十七為斗分以度法乘歲日三百六十五得六百一十五萬三千九百加斗分共得六百一十五萬八千一十七為周天以度法除之得三百六十五日二十四刻四一八七為歲實以日法除周天得二十九日五十三刻。六〇四為朔實以日法除通周五百七十四萬五千九百四十一得二

十七日五十五刻四五〇五為轉終置部月加部法得
二十二萬五千三百九十為月周加一部每十九年一
章凡八百八十七章共得二十二萬六千二百七十七
為交周以除周天得二十七日二十一刻四五〇六為
交終以步五星以部法除星率即五精數各得周日以
部除木精數六百七十二萬二千八百八十八得木周
日三百九十八日七十四刻七八除火精數一千三百
一十四萬九千八十三得火周日七百七十九日八十

九刻八一除土精數六百三十七萬四千六十一得土
周日三百七十八日五刻八一除金精數九百八十四
萬三千八百八十二得金周日五百八十三日八十六
刻除水精數一百九十五萬三千七百一十七得水周
日一百一十五日八十七刻八八較正光歷稍異

隋書

北齊文宣帝天保元年散騎侍郎宋景業依握誠圖及
元命包言齊受籙之期應六百七十六以為章作天保

歷以上元甲子積十一萬五百二十六年至天保元年
得庚午章歲六百七十六度法二萬三千六百六十斗
分五千七百八十七以度法乘歲日得八百六十三萬
五千九百加斗分共八百六十四萬一千六百八十七
為周天以度法除之得三百六十五日二十四刻四五
九為歲實以十九歸章歲凡三十五章五七九以七因
之凡二百四十九閏為章閏以十二月乘章歲得八千
一百一十二加章閏共八千三百六十一為章月以三

十五乘章月得二十九萬二千六百三十五為紀月以
紀月除周天得二十九日五十三刻○五九九為朔實
以月周三十一萬三千六百二十除周天得二十七日
五十五刻四六四二為轉終以交周三十一萬七千五
百六十六除周天得二十七日二十一刻二二五五為
交終此其數也至後主武平七年董峻鄭元偉立議非
之乃上甲寅元歷以二萬二千三百三十八為節五千
四百六十一為斗分又劉孝孫以百一十九為章八千

四十七為紀張孟賓以六百一十九為章四萬八千九百為紀九百四十八為日法萬四千九百四十五為斗分是年六月戊申朔太陽虧劉孝孫言食於卯時張孟賓言食於寅時鄭元偉董峻言食於辰時宋景業言食於巳時至日食乃於卯寅之間其言皆不能中爭端未定遂屬國亡此史論也以授時推是食在卯正合天時則孝孫孟賓為近鄭董亦近景業為疎矣大都五代諸歷家俱踵元嘉大明故法改換章節斗分妄自各立門

戶爭相妒競以塗人耳目如是而已

西魏入關尚興李業興正光歷後周明帝詔有司造周歷頗謬及武帝天和元年甄鸞造天和歷上元甲寅至天和元年景戌積八十七萬五千七百九十二算外章歲三百九十一部法二萬三千四百六十日法二十九萬一百六十斗分五千七百三十一以部法乘之得周天以日法而一得月策周天八百五十六萬八千六百三十一歲實三百六十五日二十四刻四二月策二十

九日五十三刻○七一參用推步終於宣德元年而變
周靜帝大象元年太史上士馮顯更造大象歷上元景
寅至大象元年己亥積四萬一千五百五十四算日法
五萬三千五百六十三亦名部會法章歲四百四十八
斗分三千一百六十七部法一萬二千九百九十二乃
二十九章歲之數也步得周天四百七十四萬五千二
百四十七部閏四千七百八十六部月一十六萬六百
九十歲實三百六十五日二十四刻三七朔實二十九

日五十三刻四分三馮顯自以為參校精密而不知氣多朔少所差遠矣

隋高祖初行禪代之事欲以符命曜於天下道士張賓揣知上意自云洞曉星歷盛言代謝之徵由是大被知遇命造新歷賓乃依何承天法微加增損作開皇歷其要以上元甲子己巳來至開皇四年甲辰四百一十二萬九千一算上郅法一十萬二千九百六十乃二十四章歲也章歲四百二十九者蓋每章十九以二十二

章乘之得四百一十八再加十一共四百二十九年為
章歲章月五千三百六者蓋二十二章凡五千一百七
十月又十一年一百三十六月共五千三百六月為章
月通月五百三十七萬二千二百九者蓋周天三千七
百六十萬五千四百六十三以七歸之得五百三十七
萬二千二百九為通月日法一十八萬一千九百二十
者蓋以二十四乘章月得一十二萬七千三百四十四
以十因之得一百二十七萬三千四百四十為節月以

七而一得一十八萬一千九百二十為日法置斗分二萬五千六十三以郛法而一得二十四刻三四二四為歲餘以加於每年三百六十五內共得三百六十五日二十四刻三四二四為歲實以日法除通月得二十九日五十三刻〇六一二為朔實賓厯既行劉孝孫與冀州秀才劉焯並稱其失所駁有六條及以古交食并測景辯其是非互有短長如聚訟然殊不知張賓止依元嘉舊法微加增損安得無差即孝孫等議厯亦止就舊

法辯論總之於盈縮遲疾之竅未得其真雖辯萬言何益

煬帝大業四年太史令張胃玄作大業厯自甲子元至
大業四年戊辰百四十二萬七千六百四十四年算外
章歲四百一十乃二十一章併一十一年也章閏一百
五十一章月五千七十一度法四萬二千六百四十乃
一百四章之歲度月五十二萬七千三百八十四乃一
百四章之月度月法四百六十一以除度月得一千一

百四十四為日法歲分一千五百五十七萬三千九百六十三以度月法除之得三萬三千七百八十三為月法斗分一萬三百六十三即歲餘交周五十七萬二千三百一十四周通七萬二百九周法二千五百四十八以度法除歲分得三百六十五日二十四刻三〇三四為歲實以日法除月法得二十九日五十三刻〇五九四為朔實以周法除周通得二十七日五十五刻四五五二為轉終以交周除歲分得二十七日二十一刻二

二六九為交終以度法除五星周數各得周日度法除
木數一千七百萬八千三百三十四分得三百九十八
日八十八刻二為木星周日除火數三千三百二十五
萬六千二十六得七百七十九日九十二刻五五為火
星周日除土數一千六百一十二萬一千七百六十七
得三百七十八日九刻〇一為土星周日除金數二千
四百八十九萬八千四百一十七得五百八十三日九
十二刻一五為金星周日除水數四百九十四萬一千

九十八得一百一十八日八十七刻九四為水星周日
大業歷大抵學祖冲之之法而小變其說耳

開皇二十年太史令袁充表曰京房有言太平日行上
道升平行次道霸代行下道蓋日去極近則景短而日
長去極遠則景長而日短今自隋興晝日漸長開皇元
年冬至之景長一丈二尺七十二分自爾漸短至十七
年短於舊三寸七分矣上臨朝謂百官曰日長之慶天
之佑也今當改元宜取此意乃改明年為仁壽元年因

以厯事付皇太子勇東宮劉焯以太子新立修增其書
名曰皇極厯駁正胄玄之短太子頗嘉之至仁壽四年
焯短胄玄於皇太子云胄玄時不從子半晨前別為後
日七曜愆序凡五百三十六條玄前擬獻但因入成事
非其實錄焯作於前玄獻於後且孝孫因焯胄玄後附
孝孫厯術之文又皆是孝孫所作則元本偷竊事甚分
明焯又造厯家同異名曰稽極大業元年帝知焯下其
書與胄玄參校玄駁焯厯歲率月率者平朔之章歲章

月也以平朔之率而求定朔非是云云互相駁難是非
不決焯罷歸四年太史奏日食無效帝召焯欲行其歷
曹玄排之又會焯死歷竟不行術士咸稱其妙故錄其
術云甲子元距仁壽四年甲子積一百萬八千八百四
十算歲率六百七十六乃三十五章併一十一年也月
率八千三百六十一乃歲率之月也周率二十四萬六
千九百〇五三一五朔日法一千二百四十二朔實
三萬六千六百七十七終法二千二百六十三終實六

萬二千三百六十五以朔日法乘二十七得三萬三千
五百三十四加交餘二百六十三共得三萬三千七百
九十七為交實以歲率除周率得三百六十五日二十
四刻四五四三為歲周以朔日法除朔實得二十九日
五十三刻〇五九五八為月策以終法除終實得二十
七日五十五刻四五七三為轉終以朔日法除交實得
二十七日二十一刻一七五五為交終以度法四萬六
千六百四十四除周天數一千七百三萬七千七十六

得三百六十五度二十五分七十六秒為周天度以度
法除各五星周數得各周日除木數千八百六十萬五
千四百六十八得木周日三百九十八日八十八刻二
三除火數三千六百三十七萬七千五百九十五得火
周日七百七十九日八十九刻八七除土數千七百六
十三萬五千五百九十四得土周日三百七十八日八
刻九二除金數二千七百二十三萬六千二百八得金
周日五百八十三日九十一刻六六除水數五百四十

萬五千六得水周日一百一十五日八十七刻七八大
都焯與曹玄之歷皆踵舊法為之無甚奇異焯第因玄
竊已成術反肆駁噬故不平而鳴也焯謂玄不從晨前
子半別為後日夫子半為後日亘古所同胡玄之不察
也玄謂焯不宜以平朔之章歲章月求定朔不知焯以
章月步平朔非定朔也至步定朔別有消息耳若焯之
差則坐氣大朔小所以行之不久而氣與天違此之故
也至於袁克表奏文帝引京房言日行三道及景長景

短之說甚為悖謬蓋日行去極南北有定並無因世治亂改行上下之理地中以八尺立表冬至之景一丈三尺有奇縱是日冬至加時在子亥之遠所差進退止在寸內分數即冬至前後一日之晷差亦止在寸分以內故也則又安得有後短於前至三寸七分之多耶噫嘻我知其故矣隋人步歷不精氣策未善冬至或差二三日則其景宜乎有三寸七分之差也而乃妄附太平祥稱仁壽舛矣卒之歷年三十傳國二世然則景長之效

壽耶不耶

古今律厯考卷十四

欽定四庫全書

古今律歷考卷十五

明 邢雲路 撰

歷代七

歷代考

唐書

唐歷志云唐始終二百九十餘年而歷八改曰戊寅元歷
麟德甲子元歷開元大衍歷寶應五紀歷建中正元歷元
和觀象歷長慶宣明歷景福崇玄歷止矣高祖受禪初東

都道士傅仁均治新歷合受命歲名為戊寅元歷所可考
驗者七曰唐以戊寅歲甲子日登極歷元戊寅日起甲子
如漢太初一也冬至日短星昴合堯典二也周幽王六年
十月辛卯朔入蝕限合於詩三也魯僖公五年壬子冬至
合春秋命歷序四也月有三大三小則日蝕常在朔月蝕
常在望五也命辰起子半命度起虛六符陰陽之始六也
立遲疾定朔則月行晦不東見朔不西眺七也高祖詔司
歷起二年用之擢仁均員外散騎侍郎三年正月望及二

月八月朔當蝕比不效六年詔郎中祖孝孫博士王孝通
考其得失未定九年復詔大理卿崔善為較定善為所改
凡數十條初仁均以武德元年為歷始七政皆有加減至
是復用上元積算其周天度即古赤道也貞觀初值太史
李淳風又上疏論十有八事復詔善為課二家得失其七
條改從淳風十四年太宗將祀南郊以十一月癸亥朔甲
子冬至而淳風新衍以甲子合朔冬至乃上言古歷分日
起於子半十一月當甲子合朔冬至太史令傅仁均以減

餘稍多子初為朔遂差三刻司歷南宮子明太史令薛順
等言子初及半日月未離淳風之法符合國子祭酒孔穎
達等謂平朔行之自古春秋傳或失之前為晦日也雖
癸亥日月相交明日甲子為朔可也從之仁均歷法祖
述曹玄稍以劉孝孫舊議參之麟德間仁均歷較淳風
歷最踈然更相出入其有所中淳風亦不能逾之今所
記者善為所較也

戊寅歷上元戊寅至武德九年丙戌積十六萬四千三

百四十八算外章歲六百七十六亦名行分法乃三十五章併十一年之歲章閏二百四十九乃三十五章凡二百四十五閏及十一年四閏共之之數章月八千三百六十七乃一章歲凡八千一百一十二月及閏二百四十九共之之數度法氣法九千四百六十四乃十四章積度併歲度月法一十一萬七千五十四乃十四章歲之積月日法一萬三千六以九歸度月而得歲分三百四十五萬六千六百七十五者置三百六十五日四

分度之一以氣法乘之得三百四十五萬六千七百二十六日以歲分減之減五十一日以氣法而一得每年減五十三分八八八以減三百六十五日四分度之一得三百六十五日二十四刻四六一一為歲周即以氣法除歲分得三百六十五日餘歲餘二千三百一十五再除得歲周也周分三百四十五萬六千八百四十五半者以度法乘周天度三百六十五得三百四十五萬四千三百六十加斗分二千四百八十五半得數為周

分以度法歸之得三百六十五度二十六分二十五秒
為天周也月法三十八萬四千七十五以九歸歲分而
得交會法一千二百七十四萬一千二百五十八半之
得六百三十七萬六百二十九為交分法以三十六而
一得三十五萬三千九百二十三日八十三刻為交實
以日法除月法得二十九日五十三刻○六○一為朔
實以歷法二萬八千九百六十八除歷周七十九萬八
千二百得二十七日五十五刻四五四三為轉終以日

法除交實得二十七日二十一刻二三五為交終以度
法除五星率得各周日木率三百七十七萬五千二十
三火七百三十八萬一千二百二十三土三百五十七
萬八千二百四十六金五百五十二萬六千二百水百
九萬六千六百八十三木周日三百九十八日八十八
刻二四火七百七十九日九十二刻六二土三百七十
八日九刻○三金五百八十三日九十一刻一六水一
百一十五日八十七刻九四歷志謂戊寅元歷冬至五

十餘年差一度是時約八十年差一度非五十年也謂
僖公壬子冬至推乃辛亥冬至非壬子也謂月有三大
三小固多是而亦有不盡然者非一定也其云幽王六
年十月辛卯朔日食及辰起子半度起虛六則皆是謂
淳風推癸亥夜次日甲子冬至以子初及半日月未離
雖癸亥相交可為甲子不知夜子初刻屬前日正刻屬
後日界限分明毫不容假難以子初作次日也則不若
仁均辰起子半之為是耳仁均滑州白馬人

高宗時戊寅歷漸差岐州雍人太史令李淳風作麟德
甲子元歷以古歷有章部元紀日分度分參差不齊乃
為總法千三百四十以一之損益中晷術以考日至為
渾儀表裏三重以測黃道初隋末劉焯造皇極歷其道
未行淳風約之為法改作麟德歷時以為密麟德元年
甲子距上元甲子積二十六萬九千八百八十筭總法
千三百四十乃七十章及十年之歲數期實四十八萬
九千四百二十八乃一總之日數常朔實三萬九千五

百七十一以總法除朞實得三百六十五日二十四刻
四七為歲周以總法除常朔實得二十九日五十三刻
○五九七為月策置變周四十四萬三千七十七以十
二除之得三萬六千九百二三〇八三三以總法而一
得二十七日五十五刻四五為轉終置遊交終率千
九十三萬九千三百一十三以三歸之得三百六十四
萬六千四百三十七六六以總法而一得二十七日二
十一刻二二二一為交終以總法除五星各總率得各

星周日總率木五十三萬四千四百八十三火百四萬
五千八十土五十萬六千六百二十三金七十八萬四
千四百四十九水十五萬五千二百七十八木周日三
百九十八日八十六刻八火七百七十九日九十一刻
○四土三百七十八日七刻六八金五百八十三日九
十一刻七一水一百一十五日八十七刻九一大端皆
約皇極厯而微加增損之其一以總法則校之諸厯似
為省要耳

開元九年麟德厯署日蝕比不效詔僧一行作新厯推大衍數立術以應之十五年草成而一行卒詔特進張說與厯官陳玄景等次為厯術七篇略例一篇厯議十篇表上之十七年頒行其大要著於篇者十二其一厯本議曰易天數五地數五五位相得而各有合所以成變化而行鬼神也天數始於一地數始於二合二始以位剛柔天數終於九地數終於十合二終以紀閏餘天數中於五地數中於六合二中以通律厯天有五音所

以司日也地有六律所以司辰也參伍相周究於六十
聖人以此見天地之心也自五以降為五行生數自六
以往為五材成數錯而乘之以生數衍成數位一六而
退極五十而增極一六為爻位之統五十為大衍之母
成數乘生數其筭六百為天中之積生數乘成數其筭
亦六百為地中之積合千有二百以五十約之則四象
周六爻也二十四約之則太極包四十九用也綜成數
約中積皆五十綜生數約中積皆四十兼而為天地之

數以五位取之復得二中之合矣著數之變九六各一
乾坤之象也七八各三六子之象也故爻數通乎六十
策數行乎二百四十是以大衍為天地之樞如環之無
端蓋律歷之大紀也夫數象徵於三四而章於七八卦
有三微策有四象故二微之合在始中之際焉著以七
備卦以八周故二章之合在中終之際焉中極居五六
間由闢闔之交而在章微之際者人神之極也天地中
積千有二百揲之以四為爻率三百以十位乘之為二

章之積三千以五材乘八象為二微之積四十兼章微之積則氣朔之分母也以三極參之倍六位除之凡七百六十是謂辰法而齊於代軌以十位乘之倍大衍除之凡三百四是謂刻法而齊於德運半氣朔之母千五百二十得天地出符之數因而三之凡四千五百六十當七精返初之會也易始於三微而生一象四象成而後八卦章三變皆剛太陽之象三變皆柔太陰之象一剛二柔少陽之象一柔二剛少陰之象少陽之剛有始

有壯有究少陰之柔有始有壯有究兼三才而兩之神
明動乎其中故四十九象而大業之用周矣數之德圓
故紀之以三而變於七象之德方故紀之以四而變於
八人在天地中以閏盈虛之變則閏餘之初而氣朔所
虛也以終合通大衍之母虧其地十凡九百四十為通
數終合除之得中率四十九餘十九分之九終歲之弦
而斗分復初之朔也夫十九分之九盈九而虛十地於
終極之際虧十而從天者所以遠疑陽之戰也乾盈九

隱乎龍戰之中故不見其首坤虛十以導潛龍之氣故
不見其成周日之朔分周歲之閏分與一章之弦一節
之月皆合於九百四十蓋取諸中率也一策之分十九
而章法生一揲之分七十六而節法生一節之日二萬
七千七百五十九以通數約之凡二十九日餘四百九
十九而日月相及於朔此六爻之紀也以卦當歲以爻
當月以策當日凡三十二歲而小終二百八十五小終
而與卦運大終二百八十五則參伍二終之合也數象


既合而遞行之變在乎其間矣所謂遞行者以爻率乘朔餘為十四萬九千七百以四十九用二十四象虛之復以爻率約之為四百九十八微分七十五太半則章微之中率也二十四象象有四十九著凡千一百七十六故虛遞之數七十三半氣朔之母以三極乘參伍以兩儀乘二十四變因而并之得千六百一十三為朔餘四揲氣朔之母以八氣九精遞其十七得七百四十三為氣餘歲八萬九千七百七十三而氣朔會是謂章率

歲二億七千二百九十萬九千九百二十而無小餘合
於夜半是謂部率歲百六十三億七千四百五十九萬
五千二百而大餘與歲建俱終是謂元率此不易之道
也策以紀日象以紀月故乾坤之策三百六十為日度
之準乾坤之用四十九象為月弦之檢日之一度不盈
全策月之一弦不盈全用故策餘萬五千九百四十三
則十有二中所盈也用差萬七千一百二十四則十有
二朔所虛也綜盈虛之數五歲而再閏中節相距皆當

三五弦望相距皆當二七升降之應發斂之候皆紀之以策而從日者也表裏之行朏朧之變皆紀之以用而從月者也積筭曰演紀日法曰通法月氣曰中朔朔實曰揲法歲分曰策實周天曰乾實餘分曰虛分氣策曰三元一元之策則天一遯行也月策曰四象一象之策則朔弦望相距也五行用事曰發斂候策曰天中卦策曰地中半卦曰貞悔旬周曰爻數小分母曰象統日行曰躔其差曰盈縮積盈縮曰先後古者平朔月朝見曰

朏夕見曰朏今以日之所盈縮月之所遲疾損益之或
進退其日以為定朔舒亟之度乃數使然躔離相錯偕
以損益故同謂之朏朏月行曰離遲疾曰轉度母曰轉
法遲疾有衰其變者勢也月逶迤馴屈行不中道進退
遲速不率其常過中則為速不及中則為遲積遲謂之
屈積速謂之伸陽執中以出令故曰先後陰含章以聽
命故曰屈伸日不及中則損之過則益之月不及中則
益之過則損之尊卑之用睽而及中之志同觀晷景之

進退知軌道之升降軌與晷名舛而義合其差則水漏之所從也摠名曰軌漏中晷長短謂之陟降景長則夜短景短則夜長積其陟降謂之消息遊交曰交會交而周曰交終交終不及朔謂之朔差交中不及望謂之望差日道表曰陽厯其裏曰陰厯五星見伏周謂之終率以分從日謂之終日其差為進退其二中氣議三合朔四沒滅五卦候六卦七日度八日躔盈縮九九道十晷漏中星十一日蝕十二五星諸議俱詳十六卷中



古今律歷考卷十五